



UNIVERSITÄTS-
BIBLIOTHEK
PADERBORN

Universitätsbibliothek Paderborn

Parallela Geographiae Veteris Et Novae

Parallela Geographica Italiae Veteris Et Novae

Briet, Philippe

Parisiis, 1649

§. 4. De Moribus Italarum.

urn:nbn:de:hbz:466:1-13120

PECORIS quia hîc pascuorum magna vis non est, idèd improbum vellus, & caro insipida; adde quod animalia hîc peruicaciùs sub Sole durant, sic *Barclæus*.

FRUMENTI plurimum sufficiunt Tuscia, Campania Italia, Marchia Taruifana: daret & Campania Romana si labor indigenarum terræ fertilitati responderet. Io. Barclæus contendit vberitatem vix tribus annis in Italia perdurare, & penuriam passuras illas gentes nisi vigeret in his locis sobrietas.

OLEVM Genuense, Tuscum, Campanum, Bariense, Hydruntinum celebratur.

VINVM laudatur *Græcum* in Ænariâ Insulâ, seu Ischiâ, & Vesuuiio monte; *Candidum* ad montem Flasconem: *Neapolitanum*, *Salernitanum*, *Sanseuerinum*, *Genuense* sunt vbique in precio.

METALLA. *Aurum* sufficere possunt Campania, & Tuscia: *Ferrum* Agri Cadorinus, Bellunensis, Brixianus, Montisferrati, Illua Insula. *Alumen* ager Volaterranus in Tusciâ; *Sulphur* vtraque Campania: *Hydrargyrum* Foroiulienfis ager.

Denique *Marmor* exquisitum ad Carreram effoditur vulgò Genuense dictum, cui non decedit *Tiburtinus* lapis, vulgò *le Trauertin*, itèmq; *Isticus*. In Etruriâ effoditur *Iaspis*: in Calabriâ *Berilli*, *Achates*, & aliæ gemmæ. Leguntur ad oram Genuensem *Corallia*, in Alpibus *Cristallus* inuenitur.

§. 4. De moribus Italorum.

ITALI diem ciuilem auspiciantur à Sole cadente, ex quo horam primam numerant vsque ad 24. Itaque in Æquinoctio quando apud nos hora sexta increpat, apud eos pulsatur prima. Multa de his dicuntur quæ videntur esse potiùs conuicia, quàm obseruationes. Hæc accipe ex Io. Barclæo cap. 6. eius libri, qui inscribitur *Icon animorum*. *Is gentibus*, inquit, *animus omnium rerum capax, neque pingui impetu, & tantum ad nature imperium, sed eruditè, & cum artificio virtutes, aut vitia sequuntur. Prolixè benevolentia indulgent, & ubi verè amant omnia discrimina habent infra hanc humani fœderis sanctitatem. Altè memoriam offense recondunt, & lesi interdum ad obsequia descendunt, vt inter amicitie iura tutiori iure grassentur. Ac quod noxiosissimum putes, nonnumquam animus tam facilis est ad vulnus, quàm pertinax ad cicatricem. Nutus omnes, oculos, verba in argumenta*

animi superfluâ subtilitate ducunt, & semper stant in speculâ, quid ceteri agant arbitraturi. Venena, damnatâque libidinem omiserim, quod non Italiæ propria vitia, sed in totum Orientem criminatio, maximè cum & negari faciliùs possint à consciis, & ab æmulis fingi. Ingens autem & publica crudelitatis opinio, quam illic feruntur odio inter se inimici exercere, prædonésque grassari. Cætera apud eundem si vacat perleges.

§. 5. *De Politia Italarum.*

BARBARIS Imperium Occidentale lacerantibus; Alanis & Vandalis, Africam; Visigothis, Hispaniam; Francis & Burgundionibus, Galliam; Hunnis, Illyricum deuantibus, Romani & Italiæ externa auxilia etiam barbarica respexerunt. Odoacer Rex Herulorum primus occurrit, non tam ad tutelam Italiæ quàm prædam. Is Rauennæ Momyllum Augustulum anno Christi 475. exautorauit, ac paulò post patrem eius Orestem Placentiæ occidit, sicque Italiæ Princeps, seu Rex constitutus est si non nomine, saltèm re. Tum Zeno Imperator Orientem regebat, & agrè ferebat Gothos Thraciæ partem occupasse, quæ vi retineri non potuerat. Is ergo persuasit Theodorico Gothorum Regi, qui Patricius & Consularis erat, ex dignitate eius esse Italiam vindicare. Exarsit ad illa monita Theodoricus, & Italiam cum suis Gothis ingressus triplici prælio Odoacrem vicit, ac tandem occidit, omnibusque Gothis conciliatis regnum Italiæ auspicatus est; cui successere 8. deinde Reges origine Gothi, quorum vltimus & 9. Teias Totilæ successor à Narsete Enucho Duce fortissimo Iustiniani Imperatoris victus & occisus est. Gothis ex Italiâ eiectis, Italia, Sicilia, Sardinia, Corsica Imperio Orientali contributæ sunt, quibus præesse iussus victor Narses, vtriusque militiæ Magister. Sed hic irritatus probris Sophiæ Augustæ Longobardos exciuit ex Pannoniâ vbi Hunnis permixti fixerant sedes suas. Hi Longobardi Duce Alboïno Italiam occuparunt, primusque Rex Longobardorum institutus Alboïnus, cui deinceps successere 22. eiusdem generis Reges ad Desiderium, qui 23. & vltimus fuit. Hi autem nouas leges ediderunt, ex quibus regnum Italiæ administrauerunt; Italiam in 6. Præfecturas, seu Satrapias distribuerunt, quarum duæ Marchiæ fuerunt *Anconitana*, & *Tarvisina*; Ducatus quatuor *Spoletinus*, *Taurinus*, *Foroiuliensis*, & *Beneuentanus*; Duces